

**ԿՈՍՏԱՆԴՆՈՒՊՈԼՍԻ ՀՈՒՆԱԿԱՆ ՀԱՄԱՅՆՔԻ
ՊԱՏՄՈՒԹՅՈՒՆԻՑ (XV-XVII ԴԴ.)**

ԲՐՈՒՏՅԱՆ Մ. Ա.

XV դարում օրավուր հզորացող Թուրքիայի և Բյուզանդական կայսրության միջև արդեն իսկ մեծացած հակակշիռը հասավ իր գագաթնակետին, որի արդյունքն էր 1453 թ. մայիսի 29-ին Կ. Պոլսի գրավումը թուրքերի կողմից: Համաշխարհային նշանակություն ունեցող Կ. Պոլսի ավերակների վրա բարձրանալու էր նոր մայրաքաղաք՝ Ստամբուլը:

53-օրյա հերոսական պաշտպանությունից հետո արտաքին աշխարհից մեկուսացած և անօգնական քաղաքն ընկավ թշնամու ձեռքը: Բարբարոսների ներխուժումն ուղեկցվեց ավեր ու կողոպուտներով, երկարատև թալանն ու սպանող զրեթե հողին հավասարեցրին երբեմնի հրաշագեղ քաղաքը: Հույն և օտարազգի պաշտպաններից զոհվեցին 4 հազար, գերեվարվեցին 50 հազար մարդ¹: Իրադարձությունների ականատես, ազգությամբ հույն Կրիտովուլոսը, մատնանշելով քաղաքի գրավման պատմական նշանակությունը, այն համեմատում է Տրոյայի, Կարթագենի, Հռոմի, Երուսաղեմի և այլ քաղաքների նվաճումների հետ:² Այս հեղինակը բազմիցս քննադատվել է իր թուրքամետության համար, սակայն դա տեղի է տալիս հույների հերոսական պաշտպանությունը նկարագրելու ժամանակ. «Հույները,- գրում է նա,- տեսնելով այսքան հսկայական ուժ, ապշած էին հարձակման ուժգնությունից, բայց նրանք փոխարենն ամեն ինչ արեցին՝ ոչ մի բան հաշվի չառնելով»³:

Իրադարձությունների ականատես և Կ. Պոլսի համար մղվող պայքարի մասնակից Սֆրանձին իր հուշերում գրում է, որ քաղաքի գրավման նախօրեին կայսրը ժողովրդին կոչ է անում պայքարել անձնվիրաբար և ստանում այսպիսի պատասխան. «Կզոհվենք հանուն քրիստոնեական հավատքի և մեր հայրենիքի»⁴:

Ճակատագրի բերումով հույների համար իրենց իսկ մայրաքաղաքը դարձավ հունական համայնքի կենտրոն, որը ձևավորվեց Կ. Պոլսի առումից սկսած և հետագայում շարունակված գաղթերի արդյունքում: Կ. Պոլիսը նվաճող

¹ Kritovoulos. *History of Mehmed the Conqueror. Princeton, 1954, p. 74.* Ս. Ռանսիմենը Կրիտովուլոսի և Լեոնարդ Քիոսացու (ըստ որի, գերիների թիվը 60 հազար է) հաղորդած տեղեկությունները համարում է չափազանց, քանի որ, ըստ նրա, ողջ բնակչության թիվը դժվար թե գերազանցած լիներ 50 հազարը (*Рансимен С., Падение Константинополя в 1453 г. М., 1983, с. 187*). Հիշատակարաններից մեկի համաձայն՝ հույներից 10 հազար հոգի է զոհվել (ԺԵ դարի հայերեն ձեռագրերի հիշատակարաններ. մասն Բ (1451-1480), կազմ. Խաչիկյան Լ. Ս., Ե., 1958, էջ 30):

² Kritovoulos, նշվ. աշխ., 78, 79:

³ Նույն տեղում, էջ 38:

⁴ *Византийские источники Дука и Франдзи о падении Константинополя (перевод и предисловие Степанова А. С.) (Византийский современник, М., 1953, N 7, с. 425).*

Մեհմեդ II Ֆաթիհի արձակած ֆերմանի համաձայն՝ հույները կարող էին վերադառնալ իրենց տները: Նրանց կյանքն ու ունեցվածքը համարվում էր անձեռնմխելի, որոշ ժամանակ նրանք ազատվում էին հարկերից: Ինքնակամ հանձնված թաղամասերը գերծ մնացին ավերից ու կողոպուտից: Հնազանդ բանտարկյալներին նա ազատ արձակեց, տեղավորեց Ֆեներ թաղամասում և երկար ժամանակ ազատեց հարկերից⁵: Ճոխ ու գեղեցիկ քաղաք կառուցելու համար նա պիտի օգտագործեր քրիստոնյա արհեստավորների՝ հատկապես հույների աշխատուժը, սակայն տեղաբնակ հույները մեծ մասամբ արտագաղթել կամ սպանվել էին, ուստի հարկավոր էր վերաբնակեցնել նրանց⁶: Հայտնի չէ Մեհմեդ II-ի կատարած առաջին բնագաղթի տարեթիվը: Հունական մի քանի աղբյուրների վկայությամբ բնագաղթերը սկսվել են հենց Կ. Պոլսի առման տարուց և շարունակվել շատ տարիներ⁷: 1454-1455 թթ. Սերբիայի դեմ պատերազմից վերադառնալիս Մեհմեդ II-ը 4 հազար գերիներ բնակեցրեց Կ. Պոլսի շրջակա գյուղերում: Դրանք հույներ էին, սերբեր և տարբեր ազգերի քրիստոնյաներ⁸:

Մեծ քանակությամբ հույներ վերաբնակեցվեցին Սև ծովի շրջաններից և Էգեյան ծովի կղզիներից: 1456 թ. Մեհմեդի տիրապետության տակ անցան հունական Էնոս, Թասոս, Սամոթրակե կղզիները, Լեմնոսի բնակչությունն ինքնակամ հանձնվեց օսմանցիներին՝ խոստանալով հարկատու լինել⁹: 1457-1458 թթ. Կոստանդնուպոլսի գաղթեցին Կորնթոսի հունաբնակ շրջանի բնակիչները, որոնք հաստատվեցին քաղաքի արվարձաններում¹⁰:

Երբ 1459 թ. Մեհմեդը վերադարձավ քաղաք, սկսեց զբաղվել այն բարեկարգելու գործով: Առաջին հերթին նա Կ. Պոլսում վերաբնակեցրեց իր հետ բերած պելոպոնեսցիներին: Նրանք, ովքեր հմուտ էին առևտրում, բնակեցվեցին քաղաքի կենտրոնական մասերում, մի մասն էլ տեղ գտավ գյուղերում, ստացավ սերմ ու լծկաններ՝ հողագործությամբ զբաղվելու համար¹¹: 1460 թ. Ամասրայի հանձնվելուց հետո մայրաքաղաք տեղափոխվեցին ոչ միայն հայեր, հույներ, այլև հրեաներ ու սերբեր: Տեղահան

⁵ Kritovoulos, նշվ. աշխ., էջ 93: Inalcik H., *The Ottoman Empire. The Classical Age. 1300-1600*. New York – Washington, 1973, p. 140: Մ. Ռանսիմենը չի նշում, թե դա Մեհմեդ II-ի որ ֆերմանն է Կոստանդնուպոլսի գրավումից հետո (*Рансимен С.*, նշվ. աշխ., 135): Սա հավանաբար այն ֆերմանն է, ուր խոսվում է Ղալաթիայի ինքնավարության մասին (*Успенский Ф. И., История Византийской империи, М. - Л., 1948, с. 778*).

⁶ *Μεγάλη Ελληνική Εγκυκλοπαίδεια, τομ. 10. Α η ν, σ. 292*.

⁷ Βακαλοπουλος Α., *Νε α Ελληνική Ιστορία. εσσαλονι κη, 2003, σ. 47*.

⁸ *Византийские источники Дука и Франдзи..., с. 409*.

⁹ *Այվազովսկի Գ.*, Պատմութիւն Օսմանեան պետութեան, Ա. Վենետիկ, 1841, էջ 160:

¹⁰ Կրիտովուլոսը, կորնթացիների գաղթի մասին խոսելով, ասում է. «Մեհմեդը բերեց նրանց, լրիվ անվնաս, ուրիշ վայրերից», սակայն չի հիշատակում, թե ովքեր և որտեղից են «նրանք» (*Kritovoulos*, նշվ. աշխ., էջ 136):

¹¹ Կրիտովուլոսը չի նշում, թե հատկապես որ թաղամասերում բնակվեցին պելոպոնեսցիները (*Kritovoulos*, նշվ. աշխ., էջ 139): Ըստ Ա. Դ. Նովիչևի՝ Պելոպոնեսից բերված գերիների թիվը հասնում էր 4 հազարի (*Новичев А. Д., Рабство в Османской империи в средние века (Проблемы социальной структуры и идеологии средневекового общества (межвузовский научный сборник), вып. 2, Л., 1978, с. 66*).

արվեցին Ադրիանուպոլսի, Ֆիլիպոպոլսի, Գալիպոլիի բնակիչները, մեծ մասամբ արհեստավորներ ու առևտրականներ, որոնք կարճ ժամանակում հարստացան՝ հաղթահարելով իրենց մրցակիցներին¹²:

1461 թ. Տրապիզոնի նվաճմամբ դադարեց հունական թագավորության գոյությունը: Պետականությունից զուրկ հույները մի շարք քրիստոնյաների նման հանձնվեցին բախտի քմահաճույքին: Տրապիզոնցի 800 տղաներ ենիչերի դարձվեցին: Մեծ ավարի ու կողոպուտի հետ Կ. Պոլիս բերվեցին տրապիզոնցի 1500 զերիներ, որոնց մեջ էր նաև Դավիթ թագավորի դուստր Աննան¹³:

Մինչև 1464 թ. Մեհմեդ II-ը մեծաթիվ հույների Կ. Պոլիս է տեղափոխել Միտիլենայից, Սորեայից, Կարամանից, Իկոնիայից, Լարենդայից, հաստատել քաղաքում, մի մասին տներ տվել, մյուսներին հողեր՝ տներ ու կացարաններ կառուցելու համար¹⁴: Ըստ հունական աղբյուրների՝ 1468-1474 թթ. դեպի Կարաման արշավանքի ժամանակ Մեհմեդը մեծաթիվ հույն, հայ, հրեա, թուրք բնակիչներ է բերել Կոստանդնուպոլիս: Մեծ բռնագաղթ է իրականացվել 1479 թ.: Կա կարծիք, որ երկար ժամանակ կարամանցիների ինքնակամ հոսք է եղել դեպի Կոստանդնուպոլիս: Գաղթածների մեծ մասը հույներ էին, հետո՝ հրեաներ, ավելի քիչ՝ հայեր¹⁵: Ըստ Էվլիյա Չելեբու՝ Զմյուռնիայից բերված հույները բնակվել են Բոյուք Ղալաթայում¹⁶:

1475 թ. հունիսի 5-ին Կաֆա ներխուժած թուրք զինվորները ահ ու սարսափ տարածեցին ամենուր՝ ստիպելով հանձնվել պաշտպանությունից ուժասպառ և դավաճանությունից հուսահատ եղած բնակչությանը: Պաշտպաններից 40 հազար մարդ գերեվարվեց ու տեղափոխվեց Կ. Պոլիս, հարյուրավոր տղաներ ենիչերի դարձվեցին¹⁷:

¹² Kritovoulos, նշվ. աշխ., էջ 148:

¹³ Ροδακης Π., *Ιστορία του Ποντου. τομος Ι. Γορδιοσ, 1998, σ336* (Рансимен С., նշվ. աշխ., էջ 156):

¹⁴ Βακαλοπουλος Α., նշվ. աշխ., էջ 47:

¹⁵ Նույն տեղում, էջ 48: Կարամանցիների 1479 թ. գաղթի մասին է հիշատակում գրիչ Մարտիրոսը (*Թորգոմյան Վ.*, Հիշատակարան Ամիրտովլաթա Սադմոսին (Հանդես ամսօրյա, 1895, N 8, էջ 247): Այվազովսկի Գ., նշվ. աշխ., էջ 183-184: *Армянские хронисты о падении Константинополя, подготовил к изданию А. С. Анасян, перевод с древнеармянского С. С. Аревшатяна (Византийский временник, N 7, М., 1953, с. 458).*

¹⁶ *Ապաճյան Գ.*, Ո՛ր և ինչպե՞ս զետեղուեցան գրաւումեն վերջ Իսթանպուլ բերուած հայ գաղթականները. (Շողակաթ, 1953, էջ 258):

¹⁷ Հայ-իտալական առնչություններ. ջենովական փաստաթղթերը դրիմահայերի մասին. (կազմ., առաջաբանը և ծանոթագր. Վ. Ա Միքայելյանի), Ե., 1974, էջ 153: Միքայելյան Վ., Ղրիմի հայկական գաղութի պատմություն, Ե., 1964, էջ 274: Գ. Այվազովսկին նշում է, որ Մեհմեդ II-ը Կոստանդնուպոլիս է տեղափոխել ավելի քան 40 հազար հայեր և ջենովացիներ, 1500 պատանիներ ենիչերի են դարձվել (*Այվազովսկի Գ.*, նշվ. աշխ., էջ 198): Անկասկած, այդ 40 հազարի մեջ եղել են նաև հույներ, քանի որ Վ. Միքայելյանի ներկայացրած փաստաթղթերից երևում է, որ Կաֆան վաղուց ի վեր հունաբնակ է եղել: Կաֆայից բերված հույների մասին տե՛ս *Μεγάλη Ελληνική Εγκυκλοπαίδεια*, τ. 17, σ. 952: Մ. Օրմանյանը ևս նշում է կաֆացիների գաղթի մասին (*Օրմանյան Մ.*, Ազգապատում, հ. Բ, Բեյրութ, 1960, էջ 2185):

Քայլ առ քայլ իրականացնելով Կ. Պոլիսը վերաբնակեցնելու և վերակառուցելու իր ծրագիրը՝ Մեհմեդ II-ը մեծապես հենվում էր հույն, հայ ու հրեա արհեստավորների և առևտրականների վրա:

Երկարատև գաղթերի հետևանքով Կ. Պոլսի բնակչությունն ավելացավ: 1470-ական թվականներին այն բնակեցված էր մոտ 16 հազար 384 ընտանիքներով, որոնց գրեթե կեսը մուսուլմաններ էին, քառորդ մասը՝ հույներ, մնացածը՝ հայեր, հրեաներ, գնչուներ և այլն¹⁸: Բնակչության թվաքանակի մասին կարևոր տեղեկություններ են հաղորդում 1477-1478 թթ. վիճակագրական տվյալները, որոնք վերցված են հարկացուցակներից: Դրանք, սակայն, մոտավոր են, քանի որ հարկացուցակներում ընդգրկվում էին միայն այլ տղամարդիկ՝ ընտանիքի գլխավորները և հարկատուները: Հաշվառումից դուրս էին մնում քոչվոր ընտանիքները, ստրուկները, հոգևոր ու ռազմական առաջնորդները և պաշտոնյաները, որոնք ազատված էին հարկերից, ինչպես նաև այն գյուղացիները, որոնք, հարկերից խուսափելով, ցուցակներում չէին ընդգրկվում¹⁹:

Հույն ժողովրդի համար, ինչպես նշվեց, իրենց իսկ մայրաքաղաքը դարձավ համայնքի կենտրոն, տարբեր ազգությունների և կրոնական տարբեր դավանանք ունեցող խմբերի հանրագումար, ուր կողք կողքի ապրում էին նախկին բարձրաստիճան պաշտոնյաները, գերիները, առևտրականներն ու արհեստավորները: Գերեվարված հույների մեծ մասը, հատկապես նրանք, ովքեր քաղաք բերվեցին Տրապիզոնի գրավումից հետո, եկան իրենց ունեցվածքով ու հաստատվեցին քաղաքի կենտրոնական մասում: Հատկապես հույներով էր բնակեցված Ֆեներ թաղամասը: Հարուստ հողատերերի՝ ֆանարիոտների թիվն աստիճանաբար մեծացավ, քանի որ Մեհմեդ II-ը շատ հույների տվեց բարձր պաշտոններ, գեղեցիկ տներ ու տարածքներ՝ նավամատույցների երկայնքով²⁰: Սա, ըստ երևույթին, չի բխել Մեհմեդ II-ի հունասիրությունից: Պարզապես նա, ազդեցիկներին ու հեղինակավորներին

¹⁸ Հայտնի է, որ Մեհմեդ II-ը թագադրվել է երիցս, առաջին անգամ՝ 1444 թ., իսկ վերջնականապես՝ հոր մահից հետո՝ 1451 թ.: *Ապաճյան Գ.*, Բիզանդիոն եւ իր քաղաքական ու զինվորական կացությունը գրավում են առաջ (Շողակաթ, 1953, էջ 125): Ս. Շոուն նշում է, որ Մեհմեդի թագադրման տարիներին բնակչության թիվը 16 հազար 784 էր: Անշուշտ, խոսքը Կոստանդնուպոլիսը գրավելուց հետո կատարված հաշվառման մասին է, քանի որ նրա նշած բնակչության թվաքանակը համընկնում է 1477-78 թթ. կատարված ցուցակագրման արդյունքների հետ (*Shaw S., History of the Ottoman Empire and Modern Turkey, USA, 1917, p. 60*):

¹⁹ *Ապաճյան Գ.*, Հայերու անվամբ կազմված առաջին թաղեր եւ իսթանպուլահայ բնակչությունը գրավման հաջորդող տարիներուն մեջ (Շողակաթ, 1954, N 4, էջ 92): Ա. Նովիչևը, ուսումնասիրելով վիճակագրական տվյալների վերաբերյալ Օ. Բարկանի և Ս. Շնայդերի հաղորդած տեղեկությունները, համոզվել է, որ դրանք բերված են միևնույն փաստաթղթից (*Новичев А. Д., Население Османской империи в XV-XVII вв. (Вестник Ленинградского университета, N 14, М., 1960, с. 31)*): Բնակչության թվաքանակի մասին Հ. Բնալջիկի հաղորդած տվյալները համընկնում են Օ. Բարկանի տվյալներին, մի տարբերությամբ, որ վերջինս ընդհանուր է հաշվառել քրիստոնյաներին և ոչ մուսուլմաններին, իսկ Հ. Բնալջիկն առանձնացրել է հույներին, կարամանցի հույներին, հայերին, գնչուներին և այլն (*Inalcik H., նշվ. աշխ., էջ 141*):

²⁰ *Βακαλοπουλος Α.*, նշվ. աշխ., էջ 45, 46:

որոշ արտոնություններ տալով, ցանկացել է նրանց միջոցով իրեն ենթարկել համայնքը՝ հնարավորինս ձգտելով կանխել հունական դիմադրական շարժումները: Վիճահարույց է Մ. Օրմանյանի, Հ. Սիրունու, Հ. Անասյանի այն տեսակետը, որ Մեհմեդ II-ը Կ. Պոլիս է բերել և բնակեցրել մեծաքանակ հայերի՝ ի հակակշիռ հույն տարրի: Չանագան թվական տվյալները վկայում են, որ Մեհմեդ II-ի ժամանակ թուրքերն արդեն թվաքանակով կրկնակի գերազանցել էին հույներին, որոնք միայն հոգևոր առաջնորդ ունենալով, որևէ քաղաքական ազատությունից զուրկ՝ չէին կարող այն աստիճանի լուրջ խոչընդոտ լինել թուրքական իշխանության համար, որ ի հակակշիռ հույների՝ այստեղ բերվեին և բնակեցվեին հայեր²¹: Հունական Մեծ հանրագիտարանը տարբեր վայրերից հույների տեղափոխման փաստը բացատրում է նրանով, որ բարբարոս թուրքը պիտանի էր միայն նվաճումների համար, իսկ հույն բնակչությունը նպաստելու էր պետության բարգավաճմանը, արհեստների և առևտրի զարգացմանը²²:

Մեհմեդ II-ի կողմից կարևոր քայլ էր հայ, հույն, հրեա միլիթների ճանաչումը՝ որպես կայսրության ներսում կրոնական հասարակություն՝ իրենց հոգևոր ղեկավարի իշխանության տակ: Օսմանյան կայսրությունում ոչ մահմեդական միլիթները դավանական հարցերում ենթակա էին հոգևոր առաջնորդին, որը պատասխանատու էր կենտրոնական իշխանությանը և որպես նվաճվածներ՝ մասնակցություն չունեին քաղաքական իշխանության մեջ: «Անհավատ» տարրերին մի հայտնի չափով հոգևոր և աշխարհիկ իշխանություն տալով և նրանց առաջնորդներին իրեն հպատակեցնելով՝ Մեհմեդը ձգտում էր միլիթների համակարգը ծառայեցնել իր նպատակներին²³:

Մեհմեդ II-ը հույների պատրիարք նշանակեց Գենադիոս Սքուարիոսին²⁴: Դրանով նա կարողացավ օգտագործել եկեղեցու ազդեցությունը քրիստոնյաների վրա՝ իր ձեռքին պահելով ուղղափառ համայնքը կառավարելու լծակները: Նվաճված մայրաքաղաքի առաջին պատրիարքը եղել է իր ժամանակի ճանաչված մտավորական՝ փիլիսոփա, աստվածաբան, մեծ գիտնական, որին հույները հիշում են որպես մի գործչի, որն ամբողջ կյանքում պայքարել է իր ազգի բարօրության համար և ստացել «Սուրբ» հորջորջումը²⁵: Հայտնի է Սքուարիոսի ընդդիմադիր կեցվածքը Հռոմի հետ՝ բյուզանդական եկեղեցու մերձեցման հարցում: Ֆաթիհը պատահաբար չէր ընտրել նրան և այդ ակտով կանխում էր հույների ու իր ակնհայտ թշնամու՝ պապի (Եվրոպայի) երկխոսության հնարավորությունները: Իր իմաստությամբ Սքուարիոսը

²¹ Հ. Պերպերյանը, հենվելով սկզբնաղբյուրների և վիճակագրական տվյալների վրա, հերքում է վերոհիշյալ հեղինակների տեսակետը (*Պերպերյան Հ.*, Իսթանպուլի հայ բնակչությունը քաղաքին գրավումեն մինչև Ֆաթիհ Մեհմեդ Բ-ի մահը, Հանդես ամսօրյա, 1962, N 1-4, էջ 214-216):

²² *Μεγάλη Ελληνική Εγκυκλοπαίδεια*, τομ. 10, σ. 292.

²³ Kinross L., *The Ottoman Centuries*, London, 1977, p. 112, Braude B., *Foundation Myths of the Millet System. In: Christians and Jews in the Ottoman Empire*, vol. 1, New York-London, 1982, p. 69.

²⁴ Kritovoulos, նշվ. աշխ., էջ 94:

²⁵ *Μεγάλη Ελληνική Εγκυκλοπαίδεια*, τομ. 8, σ. 198.

պատկառանք էր ազդում Մեհմեդին և նրա շրջապատին, որոնք, ինչպես հայտնի է, եվրոպացիների առջև ձգտում էին ցուցադրել այն, որ նվաճողը կարող է հակումներ ունենալ արվեստների, գիտության ու իմացության նկատմամբ: Գենադիոսի պատրիարք հռչակվելով, փաստորեն, Կ. Պոլսում հույն համայնք էր ձևավորվում՝ հոգևոր առաջնորդի ղեկավարությամբ:

Ֆ. Ուսպենսկին նշում է, որ Մեհմեդ II-ն արդեն Կ. Պոլսի գրավման երրորդ օրը վերականգնել է ուղղափառ պատրիարքությունը՝ պատրիարք նշանակելով Սքոլարիոսին²⁶: Ա. Լեբեդևի կարծիքով պատրիարքի ընտրությունը ոչ թե երրորդ օրն է կատարվել, այլ Կ. Պոլսի գրավումից մեկ տարի անց, երբ Մեհմեդ II-ը քաղաք բերեց Էգեյան ծովի կղզիներում և Սև ծովի շրջաններում բնակվող հույներին, Բուրսայում բնակվող հայերին ու Աքսարայի թուրքերին²⁷: Ռանսիմենը չի խոսում պատրիարք նշանակելու ժամանակի մասին՝ նշելով միայն, որ որոշ տատանումներից հետո Սքոլարիոսը համաձայնվեց ընդունել պատրիարքի պաշտոնը, իսկ օծման արարողությունը եղավ 1454 թ. հունվարի 6-ին²⁸, ըստ Կրիտովուսի՝ նույնպես 1454 թ.²⁹: Ըստ հունական Մեծ հանրագիտարանի՝ դեռևս 1453 թ. աշնանը Սքոլարիոսին առաջարկվել է պատրիարքի պաշտոնը, սակայն նա պաշտոնավարել է 1454-1464 թթ.³⁰: Ճշմարտությանը մոտ է թվում այն տեսակետը, որ Մեհմեդ II-ը պատրիարք է նշանակում Սքոլարիոսին, որպեսզի խրախուսի այն քրիստոնյաներին, ովքեր խուսափում էին վերադառնալ ու հաստատվել Կ. Պոլսում³¹: Կարելի է եզրակացնել, որ դեռևս 1453 թ. սուլթանը պատրիարք նշանակելու ծրագիր ուներ, քանի որ դա, իսկապես, կխրախուսեր թե՛ մայրաքաղաքում, թե՛ այնտեղից դուրս բնակվող քրիստոնյաներին: Սքոլարիոսին պատրիարք նշանակելը նպատակային էր, սակայն դրա համար ժամանակ էր հարկավոր: Պանտոկրատորի վանքում գտնվող Գենադիոսը գերեվարվել էր և տարվել Ադրիանուպոլիս և դրանից հետո միայն Մեհմեդ II-ի հրամանով բերվել Կ. Պոլիս³²: Ուրեմն Մեհմեդ II-ը կա՛մ անձամբ է ճանաչել Սքոլարիոսին (ինչի մասին հիշատակում են ականատեսները ճիշտ այնպես, ինչպես հայերի պատրիարք Հովակիմի կապակցությամբ), կա՛մ լսել է նրա մասին: Հայտնի է, որ Մեհմեդ II-ը Ադրիանուպոլսից վերադարձել է 1453 թ. ուշ աշնանը և միայն դրանից հետո զբաղվել մայրաքաղաքի ներքին հարցերով³³: Ուստի տրամաբանական է, որ Մեհմեդ II-ի և Սքոլարիոսի մի քանի հանդիպումները,

²⁶ Успенский Ф. И., История Византийской империи, т. III, М., 1958, с. 794.

²⁷ Նույն տեղում, էջ 795:

²⁸ Рансимен С., նշվ. աշխ., էջ 139: Ըստ Հ. Սիրունու՝ Սքոլարիոսը պատրիարք է օծվել 1453 թ. հունիսի 3-ին (*Սիրունի Հ. Ճ.*, Պոլիս և իր դերը, Պեյրուք, 1965, էջ 209):

²⁹ Kritovoulos, նշվ. աշխ., էջ 94: Սքոլարիոսի պատրիարք նշանակման մասին տե՛ս Չամչյան Մ., նշվ. աշխ., էջ 500, *Այվազովսկի Գ.*, նշվ. աշխ., էջ 154, *Ալպոյաճյան Ա.*, Կազմաւորություն արեւմտահայության (Շողակաթ, 1962, N 2, էջ 22 և այլն. Մ. Չամչյանը և Գ. Այվազովսկին Սքոլարիոսի նշանակման տարեթիվը համարում են 1453-ը):

³⁰ Μεγαλη Ελληνικη Εγκυκλοπαίδεια, τομ. 8, σ. 197.

³¹ Այս տեսակետն առաջ է քաշում Հ. Բնալչիկը. (Inalcik H., նշվ. աշխ., էջ 236):

³² Рансимен С., նշվ. աշխ., էջ 138:

³³ Kritovoulos, նշվ. աշխ., էջ 89:

գրույցները ժամանակ էին ենթադրում, և պատրիարքի նշանակումը պետք է լիներ 1454 թ.:

Հունական միլիթի ճանաչումը և հույն պատրիարքի նշանակումը կարևոր նշանակություն ուներ Թուրքիայում ապրող հույների և մյուս քրիստոնյաների համար: Ըստ Սֆրանձիի՝ սուլթանը և պատրիարքը համատեղ մշակել են նոր օրենքներ, համաձայն որոնց և պատրիարքին տրված գրավոր փաստաթղթի՝ Մեհմեդը նրան խոստացել է անձեռնմխելիություն, հարկերից ազատում, ինչպես նաև ազատ տեղափոխության ու արտոնությունները սերնդեսերունդ փոխանցելու իրավունք: Քրիստոնյա եկեղեցին իրավունք ուներ թաղման, ամուսնական ծեսերի կազմակերպման³⁴, Ջատկի արարողության ու եռօրյա տոնախմբությունների կազմակերպման, որի ժամանակ հունական Ֆեներ թաղամասի դարպասները երեք գիշեր բաց էին մնալու³⁵: Մեհմեդի կողմից հույներին շնորհված այս վերջին արտոնությունները պատճառ դարձան հայ-հունական հարաբերությունների հետագա սրման, մասնավորապես Ջատկի տոնախմբության շուրջ տարաձայնությունների («Օռագատիկ») հարցում:

Բնակչությունից հարկեր էր հավաքում տեղական կառավարությունը, և ուղղափառ եկեղեցու գլուխը ամեն կերպ նպաստելու էր դրան: Այս արտոնությունների հետ միասին սահմանափակվում էին «անհավատների» իրավունքները: Իսլամի և շերիի գերակայության ուժով ոչ մահմեդականներն օսմանյան հասարակությունում ստանում էին երկրորդական հպատակի կարգավիճակ: Նորաստեղծ պետությունը պիտի լիներ իսլամի տիրապետող դիրքով և բազմազգ, որին ենթարկվելու էր քրիստոնյա եկեղեցին: Իսլամի իշխանության տակ պիտի գործեին հույն ուղղափառ պատրիարքը, հայերի հոգևոր առաջնորդը, հրեաների ռաբբին (խախամապետը): Կրիտովուլոսը հիշատակում է հունական և հրեական միլիթների ճանաչման մասին՝ նշելով, որ հրեական համայնքի ղեկավար է նշանակվել Մոսես Կապսալին: Եվրոպայից բերված մեծաթիվ հրեաները 25 տարվա ընթացքում իրենց թվաքանակով պիտի դառնային երրորդը մայրաքաղաքում՝ մուսուլմաններից և հույներից հետո³⁶: Իրողություն է հրեական միլիթի ճանաչումը, քանի որ մեծաթիվ համայնքը պիտի իր առաջնորդն ունենար: Սակայն հայտնի չէ այս միլիթի ճանաչման տարեթիվը:

1461 թ. Մեհմեդ II-ը Բուրսայի հայ համայնքի եպիսկոպոս Հովակիմին նշանակեց պոլսահայ գաղութի հոգևոր առաջնորդ³⁷: Այս իրադարձության մասին Կրիտովուլոսը ոչինչ չի հիշատակում: Միակ սկզբնաղբյուրը Մ. Չամչյանն է, որը տեղեկությունը քաղել է Մաղաքիա դպիր Ճեվահիրճյանի հաղորդած տվյալներից, ըստ որի Մեհմեդ II-ը Բուրսայի ժողովրդի հետ միասին բերել է Հովակիմին, իր նախօրոք խոստման համաձայն³⁸: Եթե Մ.

³⁴ Kritovoulos, *նույն տեղում*, էջ 94-95:

³⁵ Babinger F., *Mehmed the Conquerer and His Time*, Princeton - New Jersey, 1978, p. 104.

³⁶ Kinross L., *նշվ. աշխ.*, էջ 117:

³⁷ Չամչյան Մ., *նշվ. աշխ.*, էջ 500:

³⁸ Պերպերյան Հ., Կ. Պոլսոյ հայ պատրիարքներու գավազանագիրքը՝ ըստ Մաղաքիա դպիր Ճեվահիրճյանի (Հանդես ամսօրյա, 1963 թ., N 7-9, էջ 326-342):

Ճեվահիրճյանի հաղորդած տեղեկությունը ճիշտ է, ապա Մեհմեդ II-ը Հովակիմին գիտեր դեռևս Կ. Պոլսի գրավումից առաջ և լավ հարաբերությունների մեջ էր նրա հետ³⁹։ Պատրիարքի նշանակումը կարևոր ու մեծ հանգամանք էր, որը պիտի իր արձագանքն ունենար։ Սակայն ժամանակի հեղինակները և իրադարձությունների ականատեսները լռում են սրա մասին։ Հետագա հեղինակները հարցին մոտենում են զգուշությամբ։ Այդ մասին են վկայում Մ. Օրմանյանի օգտագործած «փաթրիք» և «հոգևոր պետ» արտահայտությունները։ Ֆ. Բաբինգերը նշում է. «Եթե ճիշտ է որոշ պատմաբանների պնդումը, սուլթանը Հովակիմին տեղափոխել է Բուրսայից, հաստատել՝ որպես գերագույն գլուխ կայսրության բոլոր հայ քրիստոնյաների»⁴⁰։

Հովակիմի մասին աղբյուրների բացակայությունը կարելի է բացատրել Կ. Պոլսում բռնկված հաճախակի հրդեհներով։ Ե. Քյոմուրճյանը հիշատակում է 1645 թ. Գումգափուի հրդեհը, որի պատճառով այրվել են հայկական և հունական եկեղեցիները⁴¹։ 1641 թվականից Կ. Պոլսի հայ պատրիարքի նստավայրը Գումգափուում էր, ուստի, հավանաբար, կարևոր փաստաթղթերը այրվել էին այս կամ այն հրդեհի պատճառով։ Հովակիմի պարագայում մոլորեցնող է «պատրիարք» բառը, որը բառացի նշանակում է «հայրապետ»՝ հոգևոր առաջնորդ։ Հավանաբար XV դարի հիշատակագիրները «հայրապետը» թարգմանել են «պատրիարք»⁴² բառից։ Պատրիարքության առաջացման, նրա անվան խնդիրներին անդրադառնալով՝ հետազոտողը նշում է⁴³. «Այն, որ հայերեն հայրապետ պատվանունը բառացիորեն պատճենված է հունարեն պատրիարք բառից (պատրի-հայր, արքիս-պետ) գայթակղիչ է՝ տեղիք տալով կարծելու, որ հիշատակարանների հեղինակները, XV դ. հայրապետ ասելով, նկատի են ունեցել պատրիարք տիտղոսը»⁴⁴։

³⁹ Ըստ Բաբգեն Եպիսկոպոսի՝ Հովակիմը որպես Կոստանդնուպոլսի հայության առաջնորդ է հիշատակվում դեռևս 1438-ին (*Բաբգեն Եպիսկոպոս*, Կ. Պոլսի հայ պատրիարքության ծագումը և առաջին պատրիարք Հովակիմ արքեպիսկոպոսը (Հանդես ամսօրյա, 1924, N 9-10, էջ 441), սակայն Հ. Տեր-Անդրեասյանը, հիմք ընդունելով «Ամիրտովաթին սաղմոսը» հիշատակարանը, գրված 1459 թ., գալիս է այն եզրահանգման, որ Մ. Չամչյանը սխալվել է՝ Հովակիմին համարելով առաջին պատրիարք, իսկ Մարտիրոսին՝ չորրորդ, քանի որ Մարտիրոսը Մեհմեդ II-ի ժամանակակիցն է (*Հ. Տեր-Անդրեասյան*, Շողակաթ, 1995, էջ 99)։ Դեռևս մինչև Կ. Պոլսի գրավումը այնտեղ կային երկու Եպիսկոպոսներ։ 1433 թ. Հովհաննես Եպիսկոպոսը Կ. Պոլսի հայության հովանավորն էր, իսկ Եսային՝ Կ. Պոլսի հայոց եկեղեցու հոգաբարձուն։ Հավանաբար այդպես է եղել նաև քաղաքի գրավումից հետո, երբ առաջինի փոխարեն նշանակվել է Հովակիմը, իսկ երկրորդի փոխարեն՝ Մարտիրոսը, որը 1459 թ. հիշատակվում է իբրև հայրապետ (*Ալիեյան Ն.*, Կոստանդնուպոլսի հայոց պատրիարքության սկզբնավորությունը (Հանդես ամսօրյա, 1951, N 8-10, էջ 462), *Ալպոյաճյան Ա.*, Բաթանպոլի հայոց հոգևոր վարչության սկզբնավորությունը (Շողակաթ, 1962, N 2, էջ 27)։

⁴⁰ Babinger F., նշվ. աշխ., էջ 197։

⁴¹ Երեմիա Չելեպիի «Տարեգրական պատմութիւն» (Բազմավեպ, 1902, N 8, էջ 367-369)։

⁴² Բաբգեն Եպ., Կ. Պոլսի հայ պատրիարքության ծագումը եւ առաջին պատրիարք Հովակիմ Եպիսկոպոս (Հանդես ամսօրյա, 1924, N 9-10, էջ 440)։

⁴³ Խառատյան Ա., Կ. Պոլսի հայ պատրիարքության կազմավորման շուրջ (XV-XVII դդ.) Լրաբեր հասարակական գիտությունների, 2000, N 1 էջ 8-23)։

⁴⁴ Նույն տեղում, էջ 15։

Կան հեղինակներ, որոնք առհասարակ ժխտում են միլիթների ճանաչումը՝ դրանք համարելով առասպելներ: Այդպիսի կարծիք է հայտնում Բ. Բրաուդին: Նա պնդում է, որ Մեհմեդին առհասարակ անհրաժեշտ չէր միլիթների ճանաչումը, որ հույն և հայ պատրիարքների մասին տվյալները առասպելներ են⁴⁵: Սրանք քննադատելի գաղափարներ են, զուրկ որոշակի հիմքից: Հունական միլիթի մասին նույնիսկ Սքոլարիոսի հուշերում կան. այդ մասին նշում են Սֆրանձին և Կրիտովուլոսը: Հերքել նրանց՝ նշանակում է հերքել Կ.Պոլսի գրավմանը վերաբերող ամեն մի փաստարկ, քանի որ ժամանակի հիմնական կոթողները սրանք են եղել: Միլիթների ճանաչումը բխում էր իր իսկ՝ Մեհմեդ II-ի շահերից: Պետական կուռ կառավարման համակարգ ստեղծելով՝ նա հոգևոր առաջնորդներին իրավունքներ է տվել, սակայն սահմանափակ չափերով:

Միլիթների ճանաչման մասին փաստացի ֆերմաններ չեն պահպանվել⁴⁶, հավանաբար նորից հրդեհների և այլ աղետների պատճառներով, սակայն այս պարագայում պակաս անփոխարինելի չեն նաև սկզբնաղբյուրները:

Կ. Պոլսի հույն և հայ գաղութների ձևավորումը կատարվում էր միաժամանակ: Միմյանց հարևանությամբ ապրող այս ժողովուրդները շատ ընդհանուր բաներ ունեին և մշտապես փոխհարաբերվում էին միմյանց: Նրանց միջև բախումները հիմնականում լինում էին տեղական իշխանության հրահրմամբ, շատ ժամանակ նպատակաուղղված, որպեսզի ջլատեն քրիստոնյաների ուժերը: Մեհմեդ II-ի ֆերմանները հավասարապես տարածվում էին այս համայնքների վրա: Դրանք սկզբում հիմնականում վերաբերում էին քաղաքի բարգավաճմանը, ներքին կյանքի զարգացմանը: Պահպանվել է Ղալաթիայի հույն և հայ բնակիչներին տրված ֆերմանը, որի համաձայն՝ Ղալաթիան ստանալու էր ինքնավարություն, քրիստոնեական եկեղեցիները չէին ավերվելու, բնակչությունը կառավարությանը գլխահարկ էր վճարելու⁴⁷:

1459 թ. սուլթանի ֆերմանի համաձայն՝ բարձրաստիճան պաշտոնյաներից յուրաքանչյուրը իր տարածքում պիտի կառուցեր մի համալիր, որ կազմված կլիներ բարեգործական հիմնարկներից (իմարեթ)՝ աստվածաբանական, դպրոց, հասարակական խոհանոց, իջևանատուն: Դրանք պիտի կառուցվեին մզկիթների շուրջ և ասպարեզ էին բացելու առևտրի զարգացման համար⁴⁸: Յուրաքանչյուր այդպիսի կառույց դառնալու էր նոր թաղամասի միջուկ: Նման իրավունքներ ունեին նաև ժամանակին Մեհմեդ II-ին կամավոր հանձնված բարձրաստիճան հույները, որոնք կառուցեցին հոյակապ դղյակներ, զարկ

⁴⁵ Braude B., նշվ. աշխ., էջ 78:

⁴⁶ Մեհմեդ II-ի արձակած հրամանները չեն պահպանվել: Ներքին կյանքի, բնակչության, հողային իրավունքների մասին օրենքները լուսաբանել է Ս. Ս. Տվերիտինովան (*Аграрный строй Османской империи XV-XVII вв., Документы и материалы под ред. Тверитиновой А. С., М., 1963*):

⁴⁷ Ապաճյան Զ., Բյուզանդիոն եւ իր քաղաքական ու զինվորական կացությունը գրավում են առաջ (Շողակաթ, 1953, էջ 127):

⁴⁸ Kritovulos, նշվ. աշխ., էջ 94, Inalcik H., *The Ottoman Empire: Conquest, Organization and Economy*, London, 1978, p. 237.

տվեցին առևտրին և արհեստներին: Մեհմեդ II-ի նպատակն էր քաղաքը դարձնել առևտրի խոշոր կենտրոն, ավելացնել Կոստանդնուպոլսի փայլն ու հմայքը, այն դարձնել գիտության ու մշակույթի, արհեստի և առևտրի օջախ: Նրա հրամանով կառուցվեցին բաղնիքներ, շուկաներ, պանդոկներ, արհեստանոցներ, պաշտամունքի կառույցներ: Նրա նպատակն էր քաղաքը դարձնել ամեն առումով, ինչպիսին որ այն տարիներ առաջ էր՝ ուժի, հպարտության, ճոխության, գիտության քաղաք: «Նա աշխատանքի համար ընտրում էր ամենաթանկ ու հազվագյուտ նյութեր, նաև հոգ տանում՝ ամենալավ որմնադիրներ, քարտաշներ, հյուսներ գտնելու»⁴⁹: Ջանախնդիր Կրիտովուլոսը ամեն կերպ մեծարում է նվաճողին՝ ընդգծելով նաև, որ նա կարևոր պաշտոններ էր տալիս օգտակար մարդկանց, քաղաքի շրջակա տարածքում ապրողներին բաժանում էր հացահատիկ, լծկան, որպեսզի տրվեին գյուղատնտեսությանը⁵⁰:

Կրիտովուլոսի թուրքամետության մասին նշել են մի շարք պատմաբաններ, նաև Զ. Ուդալցովան իր քննադատական հոդվածում, ուր վեր է հանվում հույն Կրիտովուլոսի հիացմունքը Մեհմեդ II-ի և նրա կատարած «բարեգործությունների» նկատմամբ⁵¹: Հունարեն գրականությունում ևս քննադատվում է Կրիտովուլոսի թուրքամետությունը: Դա պատճառ դարձավ, որպեսզի նոր ժամանակի հույն պատմագիտությունը բացասաբար գնահատի նրան⁵²: Որպես սկզբնաղբյուր, սակայն, նա արժեք ունի, քանի որ լրացնում է Սֆրանձիի, Դուկասի, Խալկոկոնդիլասի հիշողությունները: Նրա շարադրանքը քարոզչության է վերածվում, որովհետև անտեսում է, որ Մեհմեդը նվաճող է ու դաժան տիրակալ, որը կոտորել ու կողոպտել է շատ ժողովուրդների, բազում բնակավայրեր ավերել և հեղեղել արյամբ⁵³:

Մեհմեդի կազմակերպած զանգվածային գաղթերի հետևանքով Կ. Պոլսում առաջանում էին հայկական, հունական, հրեական թաղամասեր: Հաճախ մի բնակավայրից տեղահանվածները ապրում էին նույն թաղամասում: Հրեաները բնակվեցին Խասքոյ թաղամասում⁵⁴, հույները՝ Ղալաթիայում, Ֆեներում, որտեղ և գտնվում էր նրանց պատրիարքանիստ եկեղեցին: Սքոլարիոսին պատրիարք նշանակելու ժամանակ Մեհմեդ II-ը նրան տվել էր Ս. Առաքյալների եկեղեցին, սակայն Սքոլարիոսի խնդրանքով նա շուտով

⁴⁹ Kritovulos, նշվ. աշխ., էջ 140-142:

⁵⁰ Inalcik H., նշվ. աշխ., էջ 148:

⁵¹ Удалцова З. В., *Предательская политика феодалной знати Византии в период турецкого завоевания (Византийский временник, N 7, 1953, с. 93-121)*.

⁵² Μεγάλη Ελληνική Εγκυκλοπαίδεια, τόμος 13, σ. 248, Կրիտովուլոսի թուրքամետության մասին է նշում Կ. Ա. Գորդլևսկին (Гордлевский В. А., *Избранные сочинения, т. 4, М., 1968, с. 21*).

⁵³ Մեհմեդ II-ի կազմակերպած 1464 թ. գաղթի և դաժանությունների մասին է նկարագրում Գ. Այվազովսկին (*Այվազովսկի Գ., նշվ. աշխ., էջ 175-176*):

⁵⁴ Гордлевский В. А., *Избранные сочинения, т. 4, с. 36*. Հայկական և հունական թաղամասերի մասին տե՛ս Խաչկունց Դ., Կ. Պոլսոյ հայ գաղութին ծագումը. Ընդարձակ օրացույց ազգային հիվանդանոցի, 1902, էջ 188-190, Պերպերյան Հ., Բաթանպոլի Ս. Սարգիս եկեղեցիները (Շողակաթ, 1962, N 2, էջ 43), Պերպերյան Հ., Բաթանպոլի հայ բնակչությունը քաղաքի գրավումեն մինչև Ֆաթիհ Մեհմետ Բ-ի մահը (1453-1481): Հանդես ամսօրյա, 1962, N 1-4, էջ 411):

տեղափոխվել է Ֆեներ թաղամասի Պամակարիստայի նախկին կուսանոցի տաճարը⁵⁵։ Ըստ Էվլիա Չելեբու՝ Իզմիրի ժողովուրդը բնակվում էր Բյոյուք Ղալաթայում, կարամանցիները՝ Բյոյուք և Քյուչուք Կարամանում, գալիպոլցիները՝ Թերսանեում⁵⁶։ Կաֆայի գրավումից հետո այնտեղի բնակիչների մի մասը հաստատվեց Էդիրնեգափուի և Պալաթի միջև (հետո թաղամասը կոչվեց Քեֆելի մահալլեսի), մյուս մասը՝ Կետիք փաշա թաղամասում⁵⁷։

Սկզբնական շրջանում կառավարության կողմից հույներին տրված իրավունքներն ու արտոնությունները մի նպատակ էին հետապնդում՝ ծաղկեցնել Օսմանյան կայսրության մայրաքաղաքը։ Սակայն դրանք ժամանակավոր էին։ Մեհմեդ II-ը, հակառակ իր խոստմանը, քանդում էր հունական եկեղեցիները և դրանց տեղում մզկիթներ կառուցում⁵⁸։ Հունաբնակ թաղամասերը համալրվում էին թուրքերով, որոնք աստիճանաբար դուրս էին մղում տեղացիներին։ Քիչ չէին նաև քրիստոնյաների միջև ծագած վեճերը, որ հրահրվում էին նպատակայնորեն։ Այդպիսի նպատակ էր հետապնդում Մեհմեդ II-ը այն ժամանակ, երբ հույներից եկեղեցիներ էր վերցնում ու տալիս հայերին։ Քաղաքում կատարվող հսկայական շինարարական աշխատանքների հետ միասին նա կարող էր հայերին թույլ տալ իրենց համար եկեղեցիներ կառուցել։ Սակայն Մեհմեդն անհրաժեշտ է համարում թշնամացնել տնտեսապես միմյանց հետ մրցակցող հայերին ու հույներին։ Հայերին տրված եկեղեցիների մասին կան մի շարք հակասական կարծիքներ, սակայն ճշգրտված են այն չորս եկեղեցիները, որոնք տրվել են հայերին։ Սամաթիայում բնակվող հայերը Մեհմեդ II-ից ստացան Սուլու Մանաստրի Ս. Գեորգ եկեղեցին (նախկին Պերիբլեպտոս)⁵⁹։ Ֆ. Բաբինգերի կողմից հրատարակվել է «Մեհմեդ II-ի թուրքան» վերնագրով հրովարտակը, որը վկայում է, որ Սուլու Մանաստրի մարհասա Գրիգորը հայտնել է վանքապատկան հողերում Ակքերմանից եկած հայ գաղթականների բնակվելու մասին։ Հետագա ուսումնասիրությունները պարզել են, որ թուրքան ոչ թե Մեհմեդ II-ի, այլ Սուլեյման I-ի ժամանակ է գրվել։ Հրովարտակում նշված Գրիգոր եպիսկոպոսը

⁵⁵ **Քուսիբըճեան Ե.**, Ստամպուլոյ պատմութիւն, Վիեննա, 1913, էջ 39-40։ Ե. Քյոմուրճյանը, սակայն, չի նշում պատրիարքի տեղափոխության պատճառը։ Թուրքերը չէին հանդուրժում իրենց թաղամասում քրիստոնյա եկեղեցու գոյությունը։ Իրավիճակը լարվում է, երբ պատրիարքարանի բակում թուրքի դիակ են հայտնաբերում։ Գենադիոսը, հասկանալով իրավիճակի սրությունը, նախընտրում է տեղափոխվել հունաբնակ Ֆեներ թաղամասը (**Гордлевский В. А.**, *նշվ. աշխ.*, էջ 21-22, **Рансимен С.**, *նշվ. աշխ.*, էջ 141)։

⁵⁶ **Ապաճյան Գ.**, Ո՛ր և ինչպե՞ս զետեղվեցան գրավումեն վերջ Իսթանպուլ բերված հայ գաղթականները (Շոդակաթ, 1953, N 9-10, էջ 258)։

⁵⁷ Նույն տեղում։

⁵⁸ **Гордлевский В. А.**, *նշվ. աշխ.*, էջ 25։

⁵⁹ Մեհմեդ II-ի կողմից հայերին տրված եկեղեցիների և հայ-հունական եկեղեցական հարաբերությունների մասին տե՛ս **Խառատյան Ա.**, Հայ-հունական եկեղեցական հարաբերությունները Կ. Պոլսում (Պատմա-բանասիրական հանդես, 2004, N 1, էջ 49-62)։

պաշտոնավարել է Սուլեյման I-ի տարիներին⁶⁰։ Մեհմեդ II-ը հայերին տվեց նաև Ս. Նիկողայոսը⁶¹ (նախկին Մանուելի մենաստան) և Ս. Սարգիսը (Այա Թեոդոսիա թաղում)⁶²։

Հետագայում Օսմանյան կայսրությունում եկեղեցիների գոյությունը սպառնալիքի տակ է դրվել, մեծաթիվ եկեղեցիներ է ավերել Սելիմ I-ը⁶³։ Եկեղեցիների ոչնչացման մասին վկայում են վավերագրերը, որոնցից մեկի համաձայն՝ 1564 թ. Կ. Պոլսի կադիին ուղղված հրամանագրով պիտի ավերվեր Սամաթիայի եկեղեցիներից մեկը։ Կառավարությանը հղված խնդրագրում քրիստոնյաները, նշելով, որ այդ եկեղեցին իրենց Մեհմեդ II-ն է տվել, և այն որպես հին եկեղեցի, նույնիսկ Սելիմի ժամանակ չի ավերվել, խնդրում են չավերել այն⁶⁴։

XV-XVII դդ. Օսմանյան կայսրությունում ստրկությունը մեծ տարածում է գտել։ Մեհմեդ II-ը իր նախնիների նման կիրառել է մանկահավաքության սկզբունքը (դեվշիրմեն)⁶⁵՝ իր բանակը համալրելու նպատակով⁶⁵։ Հատկապես մեծաթիվ հավաքներ են կատարվել հույներից։ Դրա մասին կան հունական մի քանի փաստաթղթեր, համաձայն որոնց մանկահավաքներ են կազմակերպվել Մորեայից, Ռոդոսից, Փոքր Ասիայից, Տրապիզոնից⁶⁶։ Դեվշիրմենի է ենթարկվել մեկ միլիոն հույն երեխա։ Գերմանացի գիտնական Հերցբերգը ենթադրում է, որ դրա արդյունքում հույների թվաքանակը կրճատվել է երեք միլիոնով⁶⁷։ Եթե դեվշիրմեն սովորաբար իրականացվում էր երեք-հինգ տարին մեկ անգամ, ապա XVI դարում հունական բնակավայրերում այն իրականացվում էր ամեն տարի։ Բանակի շարքերը համալրելուց հետո տեղահան եղած գերիներին վաճառում էին շուկաներում⁶⁸։

⁶⁰ Պերպերյան Հ., Օսմանեան քանի մը վավերագրեր Իսթանպուլի հայոց եկեղեցիներէն ոմանց մասին (Հանդես ամսօրյա, 1961, N 10-12, էջ 26), նույնի՝ Սեպհականութեան վեճ մը Սուլու Մանասթըրի վերաբերյալ (Շողակաթ. 1962, N 2, էջ 44)։

⁶¹ Պերպերյան Հ., Իսթանպուլի հայ բնակչությունը քաղաքի գրավումէն մինչեւ Ֆաթիհ Մեհմեդ Բ-ի մահը (1453-1481թթ.) Հանդես ամսօրյա, 1962, N 1-4, էջ 411)։

⁶² Պերպերյան Հ., Իսթանպուլի առաջին հայ եկեղեցիները և Ս. Գեորգ պատրիարքանիստ եկեղեցին (Շողակաթ, 1962, N 2, էջ 47)։

⁶³ Սելիմ I-ի հրամանով պիտի ավերվէին քրիստոնեական եկեղեցիները։ Դրանք փրկելու համար հույն պատրիարք Թեոփատոսը Սելիմին հիշեցրել է Մեհմեդ II-ի խոստումը, որ այլևս ոչ մի եկեղեցի չի ավերվելու։ Սելիմը նրանից գրավոր ապացույց է պահանջել, սակայն պատրիարքը, գրավոր ոչ մի փաստաթուղթ չունենալով, որպես վկա է ներկայացրել երեք զառամյալ ենիչերիներին, որոնք հաստատել են պատրիարքի պնդումները։ Դրանից հետո Սելիմը ոչ թե ավերել է եկեղեցիները, այլ նույնիսկ հույներին թույլ է տվել նոր եկեղեցի կառուցել (Այվազովսկի Գ., նշվ. աշխ., էջ 303-304, Рансимен С., նշվ. աշխ., էջ 174)։

⁶⁴ Փափազյան Ավ., Թուրքական վավերագրերը Հայաստանի և հայերի մասին (16-19-րդ դարեր), Ե., 1999, էջ 209։

⁶⁵ Անասյան Հ., XVII դարի ազատագրական շարժումները Արևմտյան Հայաստանում, Ե., 1961, էջ 31։

⁶⁶ Vryonis S., *Byzantium: Its Internal History and Relations with the Muslim World*. London, 1971, p. 435-443.

⁶⁷ Μεγαλη Ελληνικη Εγκυκλοπαιδεια, τομος 10, σ. 292.

⁶⁸ Զուլպյան Մ. Գ., «Դեվշիրմեն»-ն (մանկահավաքը) Օսմանյան կայսրության մեջ ըստ թուրքական և հայկական աղբյուրների (Պատմաբանասիրական հանդես, 1959, N 2-3 էջ 249)։

Կան թուրք հեղինակներ, որոնք ստրկության խայտառակ երևույթն արդարացնելու տեսանկյունից են նայում թուրքերի կատարած մանկահավաքությունը: Ս. Վրիոնիսը քննադատում է Թուրգութ Օզալին, քանզի վերջինս նշում է, որ քրիստոնյաները նույնիսկ հպարտ էին, որ իրենց երեխաները ենիչերի են դարձվում, քանի որ դրանով լուծվում է նրանց ապագայի և հեղինակության հարցը⁶⁹: Մինչդեռ հունական և հայկական վավերագրերում քիչ չեն այնպիսի տողերը, որոնք արտահայտում են խոր ցավ և կսկիծ՝ ժողովրդին պարտադրված այդ իսկական դժբախտության համար:

Խտրականությունը, որը դրված էր մուսուլմանների և ոչ մուսուլմանների միջև՝ երևում էր կյանքի բոլոր բնագավառներում: Ստամբուլի խասերին վերաբերող օրենքները բացահայտորեն նկարագրում են այնտեղ բնակվող հայերի և հույների իրավագուրկ վիճակը⁷⁰: Սուլթանին պատկանող այս հողերին կցված գերիներն անվանվում էին օթթաքչի-կուլեր: Նրանք աշխատում էին կիսարարության սկզբունքով, իսկ նրանց հողը, աշխատանքի գործիքները պատկանում էին տիրոջը⁷¹: Մահացած օթթաքչիի կնոջ և երեխաների ճակատագիրը տնօրինելու իրավունքը պատկանում էր տիրոջը⁷²:

Օսմանյան կայսրությունում նախապես ռայա էին կոչվում բոլոր հո-դագործները, հետո միայն անհավատ՝ «գյավուր» տարրերը: Սուլթան Սուլեյման I-ը օրենքներ է մշակել ռայաների իրավունքների մասին, համաձայն որոնց՝ պոլսաբնակ ռայային խստիվ արգելվում էր նույնիսկ տեղափոխվել: XVI դարում ռայաները հողի նկատմամբ ժառանգական իրավունք ունեին, սակայն չէին կարող այն ինքնակամ վաճառել կամ փոխանակել⁷³: Հարկային ծանր քաղաքականության պատճառով սնանկանալով՝ շատ հույներ տեղափոխվում էին Եվրոպա, Ռուսաստան և այլուր⁷⁴:

Թուրքական վավերագրերում սուր էր դրված հայի, հույնի, հրեայի տարազի հարցը: Նրանք արտաքնապես պիտի տարբերվեին մուսուլմաններից⁷⁵: 1662 թ. Կ. Պոլսում սուլթանը գլխատել տվեց մի հայի, որը դեղին մետո (մույկ) էր հագել, քանի որ քրիստոնյաներին խստիվ արգելված էր դեղին գույնի հանդերձանք և կոշիկներ հագնել⁷⁶: Սկզբնական շրջանում տրված մի քանի ազատություններն աստիճանաբար վերանում էին, իսկ եկեղեցիների լինել-չլինելու հարցը սրությամբ էր դրվում: 1661 թ. աճուրդի հանվեցին հունական, հրեական ու հայկական ազգային սեփականությունները, սակայն հույներն ու հայերը, վճարելով պահանջված գումարը, փրկեցին այն: Այդուհանդերձ, 1662

⁶⁹ Vryonis S., *The Turkish State and History*. New York, 1992, p. 6.

⁷⁰ *Аграрный строй Османской империи XV-XVII в., с. 174-191.*

⁷¹ Новичев А. Д., *Рабство в Османской империи в средние века (Проблемы социальной структуры и идеологии средневекового общества (межвузовский научный сборник), вып. 2, Л., 1978, с. 32, 67).*

⁷² *Аграрный строй Османской империи, с. 182-183.*

⁷³ Նույն տեղում, էջ 33, 50:

⁷⁴ Βακαλοπουλος Α., *նշվ. աշխ.*, էջ 67:

⁷⁵ *Փափազյան Ավ.*, *նշվ. աշխ.*, էջ 222:

⁷⁶ *Օրագրություն Երեսիա Չելեպի Քեօմիրճեանի*. Երուսաղեմ, 1939, էջ 399-400:

թ. արքունական հրամանով մեծաթիվ հունական և հայկական եկեղեցիներ ավերվեցին⁷⁷:

Առավել բարենպաստ պայմաններում էին ապրում արհեստավորները, որոնց աշխատանքը խրախուսվում էր սուլթանների կողմից: Կ. Պոլսում առկա արտոնությունների շնորհիվ շատ արհեստավորներ ինքնակամ տեղափոխվում էին մայրաքաղաք ու մտնում էսնաֆությունների մեջ: Հեղինակները նշում են, որ XV դարում Կ. Պոլսում շատ կային այդպիսի կորպորատիվ կազմակերպություններ⁷⁸: Եվրոպացիների հետ կապ ունեին կաշվի և բրդի առևտրով զբաղվողները: Որոշ համքարություններում, հատկապես այնտեղ, ուր կահույք ու սարքավորումներ էին արտադրում, գերիշխում էին հույները: Կ. Պոլսում աչքի էին ընկնում հույն շինարարների կառուցած տները⁷⁹: Արտադրանքի, վաճառքի, շուկայական հարաբերությունների որոշման և շատ այլ հարցերում հայ և հույն էսնաֆությունները մշտապես շփման և փոխկապվածության մեջ էին⁸⁰: Ֆինանսական կապիտալը պատկանում էր հայ, հույն, հրեա դրամատերերին, որոնք XVII դարում իրենց ձեռքում էին կենտրոնացրել բանկային գործառույթները: Դրանից առաջ ձևավորվել էին պոլսահայ բուրժուազիայի երկու ուղղությունները՝ չելեբիությունը և խոջայությունը⁸¹:

Մի շարք փաստաթղթերի համաձայն՝ Կ. Պոլսի հայ, հույն, հրեա բնակիչները բողոքել են ծանր հարկային քաղաքականությունից: Նրանք պահանջել են հարկերից թեթևացում՝ որպես հմուտ ձկնորսներ, նավաշինարարներ, արքունական վաճառականներ, արծաթե և ոսկե թելեր արտադրողներ⁸²: Սակայն օսմանյան կառավարության գանձարանը հարստանում էր՝ հատկապես գանձվող հարկերից: Փաստաթղթերում քիչ չեն վկայությունները՝ քրիստոնյա վաճառականների և տեղական իշխանությունների միջև հարկերի պատճառով վեճերի մասին: Այդպիսի մի վեճ առաջացավ 1650 թ.՝ հայ թելավաճառների և իշխանությունների միջև⁸³:

Հաշվի առնելով այն աղբյուրները, որոնք խոսում են XV դարում Օսմանյան կայսրությունում ապրող ժողովուրդների տնտեսական կյանքի մասին, վիճահարույց է դառնում Կրիտովուլոսի նկարագրած Մեհմեդ-բարերար հասկացությունը, քանի որ Օսմանյան կայսրության, հատկապես նրա մայրաքաղաքի ծաղկումն ու բարգավաճումը կատարվել է շատ ժողովուրդների արյան ու կյանքի, գերեվարության, կողոպուտի գնով:

Փաստ է, որ Մեհմեդ II-ի մի շարք գործողությունների շնորհիվ Կ. Պոլիսը դարձավ առևտրի, արհեստի ու կրթության կենտրոն: Նրա կառավարումից ի

⁷⁷ Անասյան Հ., նշվ. աշխ., էջ 29:

⁷⁸ Βακαλοπούλος Α., նշվ. աշխ., էջ 56:

⁷⁹ Mantran R., *Foreign Merchants and the Minorities in Istanbul during the Sixteenth and Seventeenth Centuries (Christians and Jews in the Ottoman Empire, London – New York, 1983, p. 130).*

⁸⁰ Аджян А., Зулалян М. К., *Ремесленное производство в Стамбуле в первой половине XVII века (Страны и народы Ближнего и Среднего Востока, X, Е., 1979, с. 163-198).*

⁸¹ Անասյան Հ., նշվ. աշխ., էջ 59-60:

⁸² Faroghi S., *Towns and Townsmen of Ottoman Anatolia Trade. Crafts and Food Production in an Urban Setting (1520-1650), Cambridge, 1984, p. 237*

⁸³ Նույն տեղում, էջ 28:

վեր հրեա, հայ, հույն և մասամբ մահմեդական վաճառականները տարբեր տեսակների ապրանքներ ու բնական մթերքներ էին բերում Օսմանյան կայսրության նավահանգիստներ: Ներմուծվում էին համեմունքներ, ներկեր, շաքար, հագուստներ⁸⁴: Լեվանտի ձկնեղենը, ծովային կենդանիների, զինիների առևտուրը, նավաշինությունը, նավագնացությունը հույների մենաշնորհն էր: Շնորհիվ միջնորդավորված առևտրի լայն ցանցի՝ սևծովյան և միջերկրածովյան նավահանգիստներում հույները կարողացան ակնառու դիրքերի հասնել թե՛ ծովում և թե՛ առևտրում: Կ. Պոլսի հույներին էր պատկանում պանդոկների, զինետների մեծ մասը:

Սևծովյան առևտրում գերիշխող էին հույն և հրեա առևտրականները, իսկ Կիլիկիայում և Ակքերմանում հայտնի էին հայ, հույն, թաթար առևտրականները, որոնք արտահանում էին տակառներով աղ դրած ձողաձուկ:

Օսմանյան կայսրությունում հույները կապ ունեին արևմտյան վաճառականների հետ, նրանց թարգմանիչներն էին և հիմնական ապրանքների մատակարարողները: Նավատեր հույները միջազգային առևտրին մասնակցում էին իրենց սեփական նավերով: Հույների մի զգալի մասը գործում էր նաև լուսայափոխության բնագավառում⁸⁵:

Կ. Պոլսի հունական համայնքի ձևավորումը միանգամից տեղի չունեցավ. դրա համար շատ տարիներ էին հարկավոր: Մեհմեդ II-ի հաջորդների օրոք ևս բռնագաղթեր կազմակերպվեցին, որոնց հետևանքով Կ. Պոլսի հունական համայնքն ավելի ընդլայնվեց:

ИЗ ИСТОРИИ ГРЕЧЕСКОЙ ОБЩИНЫ КОНСТАНТИНОПОЛЯ (XV-XVII ВВ.)

БРУТЯН М. А.

Резюме

1453 г. знаменуется не только падением Константинополя, но и созданием армянской колонии. В целях процветания столицы своей империи Мехмед II переселил сюда многих армянских, греческих, еврейских ремесленников и торговцев с их семьями, из Мореи, Аргоса, Коринфа (1458-63), Митилены, Евбеи (1470), Крыма (1475), Карамании (1468-74). Из этих населенных пунктов были переселены также армяне, евреи и отчасти цыгане.

Для христианского народа большое значение имело также признание греческих и армянских миллетов, в результате были назначены греческий патриарх (1454) и армянский духовный предводитель (1461).

Благодаря политике Мехмеда II в Константинополе быстрыми темпами стали развиваться ремесленничество, торговля и строительство. Константинополь стал не только греческой и армянской колонией, но и центром искусства и науки.

⁸⁴ Inalcik H., նշվ. աշխ., էջ XI, 139:

⁸⁵ Mantran R., նշվ. աշխ., էջ 133: